

قره سودا

۱

سن کیمسک ؟ سویله !

بن — قادر مطلق بفرعونک قیزی ایکن، آلتون تختلر اوستده، محتشم
یلپازهلرله کیجهلر قدر سیاه ونهایتسز اسیرلرم صیجاق طوپراقلرک، قیزغین
کوکلرک علولری ایچنده بکا سرینلک یرادیرلرکن ؛ بوتون بر اولکه، خولیا،
نینلی درین چوللری، انکین قوم دکزلری، فسونکار، کوزل یاققلی کوک
حورمالری ایله کوچک آیاقلریک آلتنده برهیچ ایکن، فرعونک آلتون حرب
آرابهسی آرقهسندن اللرک باغلی ذلیل براسیر اولارق سنی کتیردیله .

ابدیتک مطردقانونلری ازی برکوزللکه طاشلرده تجلی ایتدیرن اجدادیمک
مظلم سرایلرنده بن بر معبوده قدر متعظم ایکن، بوتون شمشعه دار زنکینلک
ودبدبه اوزرنده ک شمشعه دار کوزللک بن ایکن، سن مصرک مقدس طاشلری اوستده
چیلاق آیاقلری و آلتی سورونه رک کلن بوتون بر اولکهک، آلتون، الماس،
ذبرجد، ایپک، انسان زنکینلکی ظفر آرابه سنک آرقهسنده طاش، طوپراق،
یچاوره، حیوان آلتی کبی سوروکلن بر فرعونک آرقهسنده، برهیچ، بر سینک،
برتوزکی ایدک . سرایمک ابدی طاش صاچاقلری آلتنده قاینایان بو آلتی آرقهسنده
بوتون بودبدبه وداراتی، بو احتشام وقانی بنم سیاه کوزلرم ایچین یاپان کنج
برفرعونک کونشلی، ازی شمشعهسی آرقهسنده سن نه ایدک !

نیلک یشیل نمناک یوصونلری، کوزل نیلوفرلری آراسنده سنی بر او یونجاق
کبی کتیرتدیکم، و کتیریرکن آلتده طوتان اسیرلری زهرله یوب اولدیرن
قره ییلا نلرک قره کوزلری خاطر لاتدیغک ایچین سنی ده سیاه اسیر آلتلری آره سنه
آلشدم. قورو، سیاه، یاره لی وجودیکک اوستده کی قورو، سیاه باشکک ایچنده
یانان سیاه ضیالرده کی سحری کیم یاپمشدی، سویله !

سرایک عصر دیده بویوجیلری بوتون قدرتلری ایله اونی بوزامادیلر،
اوسیریس، سهت و رانک اک نامدار راهبلی، معبودک اک کیزلی صحراسنده

قراکلیق دعالری ، معطر توتسولری ایله بوزامادیلر ، وَ بِن صیجاق وکوزل
 مصرک قراکلیق صیجاق کیجه لرینک عطری ، حرارتی ، جاذبه سی ضربان
 ایدن ، یانان بر اورتوسی اولان سیاه صاچلرمله ، نور کوزلرمله بوزامادم . سرائیمک
 اک حقیر براسیری اولان سن ، نیلک اک زهرناک یموشاق برییلانی کبی اک یوکسک
 یرلرینه سسزجه وکیلجه سوروندک کیردک . کیجه کوزلرکده کی بویوایله فرعون
 قانسک ، اللهلردن کلن عظمت و قدرتی باغلادک ، ایجه دیلنده کی زهراایله مرمر
 کوکسمک صفوق کوزللکنی دلدک ، تاقلبمه احتراص جنت و اسارت آقیتدک ؛
 افسانه قبلانلرینک سحرلی طیرناقلری کبی بوتون وارلغمی طیرمالادک ؛ چولدن ،
 داها انکین ، کوکدن داها اسرارلی ، ییلدیزدن داها ابدی بر حکمله بکا حاکم
 اولدک !

سنی ، مقدس بر معبود قدر کوزل بر فرعون قیزی بیله مغلوب ایدممدی .
 کنج وقادر مطلق بر فرعونک آياقلری آلتنده اولورکن ، کیجه کوزلرکک بویولری
 ایله کوکده کونشی سوندردک ، صحرالری آیدنلاتان ییلدیزلری سوندردک ، حرما
 آناچلرندە پارلدايان نمناک یشیل نورلری سوندردک ، نیلی بوتون منبعی ، دکیزلری ،
 بوتون بویوکلکی ایله قراتدک : کاشناتده نەرنک ، نەضیا قالدی . واک صوکر
 کوزلرم ، قلم وَ بِن آلورلی سونمش بر کمور پارچه سی کبی یاندق ، قارادق ،
 وسوندک ... سویله ! سن کیمسک ؟